



KOSOVO SPECIALIST CHAMBERS  
DHOMAT E SPECIALIZUARA TË KOSOVËS  
SPECIJALIZOVANA VEÇA KOSOVA

**Numri:** KSC-BC-2018-01

**Vendosi:** Paneli i përbërë prej një gjykatësi të vetëm  
Gjykatës Nikola Giju

**Administratore:** Dr. Fidelma Donlon

**Data:** 24 shtator 2020

**Gjuha:** Anglishte

**Klasifikimi:** Publik

---

**Version i redaktuar publik i  
urdhrit për transferim në objektin e paraburgimit të Dhomave të Specializuara**

---

**Prokurorit të Specializuar**

Xhek Smith

**T'i dorëzohet**

Z. Hysni Gucati

**UNË, GJYKATËS NIKOLA GIJU, gjykatës i vetëm i Dhomave të Specializuara të Kosovës, i caktuar prej Kryetares së Dhomave të Specializuara në përputhje me nenin 33(2) të Ligjit nr. 05/L-53 për Dhomat e Specializuara dhe Zyrën e Prokurorit të Specializuar (“Ligji”);**

**PASI KAM MARRË** kërkesën rreptësisht konfidenciale dhe *ex parte* të Zyrës së Prokurorit të Specializuar (“ZPS”) për lëshimin e fletarrestimeve dhe urdhrave të tjerë të lidhur me to, të datës 22 shtator 2020;

**PASI KAM KONSTATUAR** se ekziston dyshimi i bazuar që Hysni Gucati, kryetari i Organizatës së Veteranëve të Luftës të Ushtrisë Çlirimtare të Kosovës (“z. Gucati”) është penalisht përgjegjës për veprat penale të frikësimit gjatë procedimit penal, hakmarrjes dhe shkeljes së fshehtësisë së procedurës, të ndëshkueshme në bazë të neneve 387, 388 dhe 392 të Kodit nr. 06/L-074 – Kodi Penal i Kosovës i vitit 2019, sikurse përfshihen në nenin 15(2) të Ligjit;

**PASI KAM KONSTATUAR** se ekzistojnë arsye të artikulueshme për të besuar se arrestimi i z. Gucati është i domosdoshëm;

**PASI KAM LËSHUAR** fletarrestim për z. Gucati, i lindur më 30 mars 1963 në Morinë, Skënderaj, Kosovë, aktualisht shtetas i Kosovës, numri personal [REDAKTUAR], me adresë të fundit të ditur në [REDAKTUAR], Kosovë;

**DUKE MARRË SHËNIM** vendimin e Kryetares së Dhomave të Specializuara për caktimin e vendit të zhvillimit të kësaj procedure në Holandë (“shteti pritës”);

**BAZUAR NË** nenet 3(8)(a), 39(3), 41(5) dhe (7), 53 dhe 55 të Ligjit, rregullat 50, 55(4) dhe (6) të Rregullores së Procedurës dhe të Provave para Dhomave të Specializuara të Kosovës;

**URDHËROJ** Administratoren që këtë urdhër për transferim t’ia përcjellë Kosovës, cilitdo shteti të tretë përkatës (të tranzitit), nëse është rasti, dhe shtetit pritës;

**URDHËROJ** Administratoren të bëjë përgatitjet e nevojshme për transferimin e pa vonesë të z. Gucati në objektin e paraburgimit të Dhomave të Specializuara në shtetin pritës, në koordinim me ZPS-në dhe me autoritetet kompetente të Kosovës, të cilitdo shteti të tretë përkatës (të tranzitit), nëse është rasti, dhe të shtetit pritës;

**URDHËROJ** Administratoren që gjatë përcjelljes së këtij urdhri për transferim, të kërkojë ndihmë veçanërisht për: (i) kalimin e sigurt dhe të papenguar të z. Gucati dhe zyrtarëve shoqërues, si edhe të të gjitha gjësendeve të personave të lartpërmendur, nëpër kontrollet kufitare dhe pika të tjera kontrolli; (ii) pranimin e dokumenteve të udhëtimit dhe identifikimit të lëshuara nga shteti pritës ose Dhomat e Specializuara; dhe (iii) garantimin e sigurisë së çdo avioni dhe/ose mjete tjetër transporti të përdorur për këtë transferim dhe mundësimin e kalimit të papenguar të ekuipazheve të tyre nëpër kontrollet kufitare shtetërore, në qoftë se është e nevojshme;

**AUTORIZOJ** Administratoren të urdhërojë autoritetet kompetente të Kosovës që t'i përcjellin Administratores çfarëdo të dhënash ose informacioni të rëndësishëm në lidhje me transferimin e z. Gucati, dhe rikujtoj se, duke pasur parasysh përparësinë e Dhomave të Specializuara kundrejt të gjitha gjykatave të tjera në Kosovë, autoritetet kosovare duhet të përmbushin këtë urdhër në përputhje me nenin 53(2) dhe (3) të Ligjit, duke mundësuar në këtë mënyrë zbatimin e transferimit të z. Gucati; dhe rikujtoj se, në rast se një subjekt, zyrtar i qeverisë së Kosovës, ose cilitdo person tjetër në Kosovë, pengon zbatimin e këtij urdhri ose shkel cilindo prej kushteve të tij, kjo mund të përbëjë vepër penale në bazë të nenit 15(2) të Ligjit;

**AUTORIZOJ** Administratoren t'u kërkojë autoriteteve kompetente të cilitdo shteti të tretë (të tranzitit), nëse është rasti, që të ofrojnë ndihmën e tyre për zbatimin e transferimit të z. Gucati, në përputhje me nenin 55 të ligjit. Në lidhje me këtë, nëse do të paraqiten vështirësi teknike ose logjistike në ekzekutimin e këtij urdhri, autoritetet kompetente shtetërore ftohen t'ua bëjnë ato të ditura përfaqësuesve të ZPS-së dhe/ose Zyrës Administrative, sipas rastit;

**URDHËROJ** Administratoren të marrë të gjitha masat e nevojshme për garantimin e sigurisë operative dhe të sigurisë së z. Gucati dhe të cilitdo zyrtari të gjykatës dhe punonjësi tjetër që e shoqëron atë gjatë transferimit dhe deri në mbërritjen e tyre në vendin e paraburgimit në shtetin pritës dhe në shtetet e treta (të tranzitit);

**VENDOS** që ky urdhër, aktualisht i klasifikuar si rreptësisht konfidencial dhe *ex parte*, mund t'u komunikohet ose ekzistenca e tij mund t'u bëhet e ditur autoriteteve kompetente të Kosovës, të një shteti të tretë (të tranzitit), dhe të shtetit pritës, në qoftë se është e domosdoshme për zbatimin e urdhrit të transferimit;

**URDHËROJ** ZPS-në t'i përcjellë Administratores të gjithë informacionin e disponueshëm që mund të ndihmojë në zbatimin e këtij urdhri për transferim si edhe çfarëdo informacioni tjetër të rëndësishëm për vlerësimin e ndonjë rreziku të mundshëm për viktimat dhe dëshmitarët që lidhet me arrestimin dhe transferimin e të dyshuarit; dhe

**RIKUJTOJ** se, në përputhje me nenet 53(2) dhe 54 të Ligjit, Dhomat e Specializuara kanë përparësi kundrejt të gjitha gjykatave në Kosovë dhe ky urdhër ka të njëjtën fuqi ligjore sikurse urdhrat e lëshuar nga cilado gjykatë apo cilido gjykatës tjetër i Kosovës.

/nënshkrim/

**Gjykatës Nikola Giju**

**Gjykatës i vetëm**

E enjte, 24 shtator 2020

Në Hagë, Holandë